


Deficultà	Lunghëza te km	Dureda te h	Deslivel
Scialdi saurì	0,6Km	00:15	+ 20m - 18m



Descrizion dla jita

A ce fusties ti jons'a do ntan chësta jita?

La storia dl nridlamënt de Urtijëi va de reviers giut dan l'ann 1000 do Gejù Crist, ma na dinamica particolarmënter da vivanda se porta pro dal 19ejm secul inant – do la costruzion dl stradon de Gherdëina. Ntlëuta fovel mo l'ert dl ziplé y la industria dla chiena che, pervia de si suzes mundiel, ti à dat na gran sburdla al prugres dl paesc mudan defin si cialé ora: cun la dlieja nueva y la costruzion dla scola, de berstotes y villes de artisç y mprenditëures. Na segonda sburdla dl svilup porta l alpinism, l sport da d'inviern y l turism, che ne muda nia mé nchin a ncuei dassënn l luech, ma nce si

ambient soziel y culturel.

Ce nes aspieta pa?

La raida tres l paesc ala crissa dla fusties dla storia de Urtijëi ie n 600 metri longia. La ie dut ntéur zénza réms architetonics y perchél da fé zénza problems nce per chi che à deficultheies a se muever a pe. L deslivel ie de 12 metri y l tēmp da jì a pe 20 menuc.

Ulà nes mëina pa la jita?

Pion via dal monumënt dla ferata de Gherdëina y dala scultura de santa Barbara tla streda Stazion y jon de viers dl zénter via pra l monumënt a Johann Baptist Purger, l costrutëur dl prim stradon te Gherdëina. Da tlo mëina la jita dlongia l ruf de Val d'Anna sa la cësa Bugon, che fova n iede la sënta de na firma de chiena de suzes.

Jan via per l puent de Pana ruvons sun plaza de dlieja cun la dlieja de pluania y la capela di morc. Po jons inant nchin pra la cësa Pana, che ie nluegeda tl nujel de nridlamënt medievel dl luech, passon via la Cësa de cultura, che ie unida frabicheda n ucajion di mundiei de schi dl 1970, y ruvon tl raion da jì a pe dl paesc. La plaza dan l hotel Stetteneck ie n auter pont storich dl luech. Tlo fovel n iede l mesc Ortiseit, da chël che l paesc à giapà si inuem ladin Urtijëi. Ntëur la plaza dla posta iel dlongia la frabica storica dla scola, nce trëi albiercs da na tradizion longia: l Hotel Adler, l Hotel Post-Cavallino Bianco y l Hotel Stetteneck.

Jon de reviers passan pra la cësa da Ianon, che ie sota defendura di Bëns culturei, y via per l puent dl Purger pra chël che l fova n iede l "Packhaus", l magasin de spedizion dl ferleigher Purger, y da iló de reviers al pont da ulache son piei via tla streda Stazion.

Ogec dla jita

1.



SANTA BARBARA

Patrona di feratieres dla ferata de Gherdëina

2.



CËSA BUGON

Sënta de un di plu vedli ferleigheri de chiena

3.



MOLETA Y PORTACONDLA

Sortimënt de "marcanzia blancia" de marueia

4.



JUESC CUN PËIS DE PLOM

L'ert dl balanz

5.



DLIEJA DE PLUANIA DE SAN DURICH

Aredamënt cun scultures de artisç dl luech

6.



CAPELA DI MORC

N lecort di saudeies morc tla Gran viera

7.



CESA PURGER (CESA DE CULTURA)

Dala cësa da ferleigher y de marcanzia ala cësa de cultura

8.



CIAVAL DE LËN DE GHERDËINA SUN NA BREA DA RODES

L juech che i mutons ova plu gën

9.



GINAST SUN STANGIA Y CRAMAIC

Juesc che se lascia muever

10.



CESA PANA

La cësa dl costrutEUR dla streda de Gherdëina

11.



LA SCOLA ELEMENTERA Y PRUFESCIUNELA DE URTIJEI DA N IEDE

Frabicheda tl tëmp dla Monarchia asburgica

12.  **USTARIA DA MAURIZ (NCUEI HOTEL ADLER)**
Ustaria, grand hotel, Spa Resort: la cësa dala storia plu longia cun n svilup ejemplar
13.  **HOTEL AM STETTENECK**
Becaria, ufize dla posta, dependance, hotel: na cësa cun na storia muvimenteda
14.  **USTARIA DA DËUR (NCUEI HOTEL “CAVALLINO BIANCO”)**
400 ani de storia: un di plu vedli albiercs de Gherdëina
15.  **MAGASIN DE SPEDIZION (TUBLÀ) DL PURGER**
Magasin de spedizion de chiena y ert sacra
16.  **MONUMËNT A JOHANN BAPTIST PURGER**
Lecort al costrutëur dla streda de Gherdëina dl 1856



Finanziert von der
Europäischen Union
NextGenerationEU

